


Dal Colm de Luna a l'Enrosadira

L grop de fotografes da Moena "I Cucaloch" à endrezà na bela mostra tel Palaz de la Region a Trent che se pel veder amò per pec dis



L'esposizion de retrac de "I Cucaloch" tel Palaz de la Region a Trent.

Trent - "De spes vardon senza veder. De spes scoiton senza sentir. Epura paesajes e creature maraveose ne stasc dintorn." L'é n messaje scempie chel che travers chesta frase, che aon robà dal sit internet www.icucaloch.it, Ennio Adami, Elio Vadagnini, Livio Vadagnini e Alberto Degiampietro vel ge sporjer a chi che vèrda si retrac. L bel de l'èlba, del fiorir del soreie, de n fior che se verc da doman bonora o che relusc su la rosèda. E i é jic fin a Trent per meter fora si bie retrac, per fèr cognoscer ence foravia la beleza de noscia natura.

Dò i aprijiamenc abui co la mostres endrezèdes chest istà passà e col calandèr ladin de l'Istitut "majon di fascegn", su envit del conseier provinzièl Luigi Chiocchetti l grop de fotografes "I Cucaloch" à abù l'onor enstadi te inaugurèr na mostra te la sala de raprezentanza del Palaz de la Region a Trent. La mostra à per titol "Dal colm de Luna a l'Enrosadira": 75 fotografies da mirèr, che mena chi che ge vèrda te n mond vif, reèl epura béleche corì da na coltrina magica. L'esposizion resta fora amò per pec dis, se pel la veder anché e en lunesc ai 28 de mèrz, da les 8 da doman

a les 8 da sera.

L'obietif del grop l'é prum de dut ge fèr cognoscer e aprijier i particulères maraveousc de la natura ence a la jent che stèsc te zità. "Bastassa demò n'ora de viac da Trent per ruèr te chest mond rich de fascinazion – i à dit. Anchecòndi con aparac ence pìcoi, che se pel se tor dò daperdut, se pol aer resultac ence bogh. Aboncont chel che ne prem l'é che la jent se recorde semper de respetar e rencurar la natura, ence tel far i retrac."

Chisc cater fotografes moenac i à na gran pascion per la natura e

per la fotografia che se palesa te duc si retrac. Ades che i se à fat cognoscer belebon anter sia jent i volessa portèr sia "èrt" ence foravia, per chest i à dat l'adejion al festival fotografich Alpine Pearls e ge saessa bel baratèr sia esperienza e l'esposizion de si retrac con l'autra valèdes ladines o di raions da mont.

L'envit che ne sporc endèna "I cucaloch" l'é de jir con ic te chest curt viac, che no vel demò regalèr emozions e poejia, ma ence n messaje fort de amor e respet, percheche l colm de luna e l'enrosadira posse amò ne encantèr al lonch, amò e amò. (mci)



I fotografes del grop con l conseier provinzièl ladin Luigi Chiocchetti.